



(interventions de M. le Ministre Jean Asselborn et M. Dan Kersch) | M. Sven Clement (parole après ministre) | M. le Ministre Jean Asselborn (intervention de M. Sven Clement)

Motion 1 : M. Fernand Kartheiser | M. Sven Clement | M. Yves Cruchten

Vote sur la motion 1 modifiée (adoptée)

Motion 2 : M. Jean Asselborn, Ministre des Affaires étrangères et européennes

Vote sur la motion 2 (adoptée)

Motion 3 : M. Fernand Kartheiser

Vote sur la motion 3 (adoptée)

Motion 4 : M. Sven Clement | M. Claude Wiseler | Mme Nathalie Oberweis | M. Yves Cruchten | M. Fernand Kartheiser (interventions de M. Jean Asselborn, Ministre des Affaires étrangères et européennes, et M. Sven Clement) | M. Dan Kersch | M. Claude Wiseler | M. Fernand Kartheiser | M. Yves Cruchten (interventions de M. Dan Kersch et M. Sven Clement) | M. Sven Clement

Vote sur la motion 4 (rejetée)

4. Dépôt d'une proposition de loi par M. Sven Clement

p. 68

Exposé : M. Sven Clement

5. 7957 – Projet de loi portant approbation de l'Accord entre le Grand-Duché de Luxembourg et la Principauté de Monaco concernant l'hébergement de données et de systèmes d'information, fait à Luxembourg, le 15 juillet 2021

p. 68

Rapport de la Commission des Affaires étrangères et européennes, de la Coopération, de l'Immigration et de l'Asile : Mme Lydia Mutsch

Discussion générale : M. Claude Wiseler | M. Gusti Graas | Mme Stéphanie Empain | M. Fernand Kartheiser | Mme Nathalie Oberweis | M. Sven Clement

Prise de position du Gouvernement : M. Jean Asselborn, Ministre des Affaires étrangères et européennes

Vote sur l'ensemble du projet de loi 7957 et dispense du second vote constitutionnel

Au banc du Gouvernement se trouve : M. Jean Asselborn, Ministre.

(La séance publique est ouverte à 14.02 heures.)

1. Ouverture de la séance publique

M. Mars Di Bartolomeo, Président de séance | Gudde Mëtteg, Kollegeinnen a Kollegen, ech maachen heimat d'Sëtzung op. Eise President huet mech gebieden, hien zum Ufank vun der Sëtzung ze ersetzen.

An ech wollt direkt d'Fro un d'Regierung stellen, ob se eng Kommunikatioun ze maachen huet. Här Ausseminister?

M. Jean Asselborn, Ministre | Entschëllegt, de Moment, Här President, ass näischt ze mellen.

(Hilarité)

M. Mars Di Bartolomeo, Président de séance | D'Regierung mellt herno.

2. Dépôt d'une proposition de loi par M. Dan Biancalana

Dann hunn ech d'Demande vum Här Biancalana, fir eng Proposition de loi ze deponéieren. Här Biancalana, Dir hutt d'Wuert.

Exposé

M. Dan Biancalana (LSAP), auteur | Merci, Här President. Jo, ech wollt hei am Numm vum Mars Di Bartolomeo a vu mir selwer eng Proposition de loi deposéieren, fir den 102 fräiwëllege Spuenie-Kämpfer, déi 1936 Lëtzebuerg verlooss hunn, fir an de Spuenie-Krich ze goen, à titre posthume déi offiziell Unerkennung als Resistenzler ze accordéieren. Si hunn hiert Liewe riskéiert. Verschiddener sinn och am Krich gefall. E puer vun hinnen hunn iwwerliewt. Haut, 83 Joer duerno, ass leider kee vun deenen 102 méi ënner eis.

Dir wësst, am generelle politeschen an historieschen Kontext, de Generol Franco huet duerch säi Putsch a mat Hëllef vum Mussolini an Hitler déi jonk spuenesch Republik gestierzt. An effektiv sinn international Brigade vun 1936 bis 1939, an duerfir och déi aus Lëtzebuerg, dohinnegegaangen, fir sech fir déi demokrateschen Wäerter anzesetzen, an hu gekämpft fir d'Fräiheet, de Friden an d'Justiz. Si ware Resistenzler vun der éischter Stonn, well se am Fong dem Faschismus an dem Naziregime d'Stier gebueden hunn, an dat virum Ufank vum Zweete Weltkrich.

1997 kruten d'Spuenie-Kämpfer am Quartier Italien zu Diddeleng bei der Gare, do wou se fortgaange

sinn, e Monument mam Numm „No pasarán“ gestëft, mat Besuch op Guernica.

2003 huet dëst Haus der Proposition de loi vum Alex Bodry a vum Mars Di Bartolomeo unanime Rechnung gedroen, fir d'Spuenie-Kämpfer ze rehabilitéieren a fir si esou definitiv juristesche aus hirem illegale Statut erauszehuelen, an dee se duerch d'Gesetz vum 10. Abrëll 1937 gesat goufen, dat Gesetz, dat d'Participatioun am Spuenie-Krich ënner Verbuuet gestallt hat. 2021 kruten d'Spuenie-Kämpfer eng Plack bei der Gëlle Fra a sinn och an deen offizielle Programm opgeholl gi vun der Commémoration nationale.

Wat awer 2003 net erfollegt ass an net zréckbehalde gouf, obwuel dat an der Proposition de loi stoung – an dat wëlle mer haut mat dëser Proposition de loi nohuelen –, dat ass, e Schratt méi wäit ze goen, an zwar eng Ausdeenung vum Champ d'application vum Gesetz vum 25. Februar 1967 virzehuelen, dat nottament de Statut vum Resistenzler definéiert. Et soll kee Régime spécifique ginn, d'Spuenie-Kämpfer solle mat deem Statut assimiléiert ginn. An aneren europäesche Länner goufen änlech Demarché gemaach, nottament a Frankräich, wou se de Statut vum Ancien combattant och unerkannt kruten.

Dës Unerkennung, déi largement am Fong méritéiert a verdéngt ass, soll, wéi gesot, à titre posthume an ouni iergendeng materiell Entschiedegung erfollegen.

Merci.

8095 – Proposition de loi relative à la reconnaissance du titre honorifique de résistant aux volontaires de l'Espagne républicaine

Plusieurs voix | Très bien!

M. Mars Di Bartolomeo, Président de séance | Merci och, Här Biancalana.

3. Débat sur la politique européenne et étrangère

Da géife mer haut zu eisem normalen Ordre du jour iwwergeen, dat heescht zu eisen Debatten iwwert d'Aussen- an d'Europapolitik. D'Riedezäit ass nom Modell 2 festgeluecht. An den éischte Riedner, deen och scho prett ass, ass den Här Claude Wiseler fir d'CSV. Här Wiseler, Dir hutt d'Wuert.

M. Claude Wiseler (CSV) | Villmools merci, Här President. Dëst Joer ass et déi lescht Debatt iwwert

d'Aussepolitik an dëser Legislaturperiod. Ech hunn och dowéinst e wéineg nogekuckt, wat säit 2019 gesot ginn ass a menge Rieden, am Ausseminister senge Rieden, och an anere Kollegen hire Rieden an hu festgestallt, datt d'Welt säithier vill, total geännert huet an den Astellungen, an de Visiounen, déi mer hunn, an deem, wat mer ausdrécken, an de leschten Debatten, déi mer iwwert d'Aussepolitik haten. Mir sinn duerch zwou Krisen gaangen, d'Covidkris an d'Ukrain-Kris, an déi hunn och eis Approche zur Aussepolitik fundamental geännert. Dat ass dat Éischt.

Dat Zweet ass awer: Et ass viles anescht, mee awer och viles net anescht. Viles vun deem, wat mer haut als eng grouss Menace gesinn oder wat anescht ass, louch schonn déizäit, an deene leschte Joren an deene Rieden, déi mer gehalen hunn, an deem, wat mer expriméiert hunn, och an der Loft, wat och zu engem Deel schonns kloer gesot ginn ass.

Ech war doriwwer erstaunt, wéi kloer heiansdo Saache scho waren, éier se geschitt sinn. Dee Ruff no der Independenz an no der Autarcie hutt ganz Diskussiounen hei geféllt, Säite vun eisen Discoursen geféllt an dësem Debat iwwert d'Aussepolitik, och d'Diskussioun iwwert d'Globalisatioun, iwwert d'Energieversuergung, iwwert d'Alimentatioun, déi scho Problemer gestallt huet virun zwee, dräi Joer. Och eis Verdeidigungspolitik, wou mer gefrot hunn – ech ka mech erënneren u vill Rieden, déi ech hei gehalen hunn – fir méi Engagement, well et inakzeptabel ass, datt Lëtzebuerg am Kader vun der Verdeidigungspolitik dee Leschten an der NATO-Klass ass; dat froe mer säit Joren.

Oder och nach d'Noutwendegkeet, fir déi aussepolitisch Decisiounen esou ze huelen, datt kee Blocage an der Europäescher Unioun kann entstoen, dat heescht, fir de Prinzip vum der absolutter Majoritéit, oder der Unanimitéit, an Europa ze brechen, ass och eng Konstant a villen Discoursen heibanne gewiescht. An och déi Warnungen iwwer China, Russland, d'Tierkei ware Konstante vun eisen, vu mengen Discoursen am Numm vun der CSV heibannen an deene leschte Joren.

D'Welt ass weidergaangen. Si ass anescht weidergaangen, wéi mer geduecht haten. Déi Krisen, déi mer unthematiséiert hunn, sinn am Fong méi schnell komm a méi hefteg komm, wéi mer et an deene Jore virdru geduecht hunn. Mir waren eis de Gefore bewosst, mee mir hunn awer net als Lëtzebuerg an als Europa reagéiert, well mer selwer warscheinlech net esou dru gegleeft hunn, wéi mer hätte sollen dru gleewen.